

**HOTUBA YA KATIBU MKUU OFISI YA WAZIRI MKUU KWENYE
UFUNGAJI WA KONGAMANO LA KWANZA LA SERIKALI MTANDAO
KATIKA UKUMBI WA AICC ARUSHA, TAREHE 20 AGOSTI, 2015**

***Ndugu HAB Mkwizu, Kaimu Katibu Mkuu Ofisi ya Rais, Menejimenti ya
Utumishi wa Umma;***

Ndugu Makatibu Wakuu mliopo;

Ndugu Naibu Makatibu Wakuu mliopo;

Ndugu Makatibu Tawala wa Mikoa mliopo;

***Ndugu Watendaji wa Wakuu wa Taasisi za Umma na Wakurugenzi wa
Mamlaka za Serikali za Mitaa mliopo;***

Ndugu Wajumbe wa Bodi ya Wakala ya Serikali Mtabdao mliopo;

Watoa Mada;

Wana Habari;

Wageni Waalikwa;

Mabibi na Mabwana;

Ninapenda kuchukua fursa hii kuwashukuru waandaaji wa Kongamano hili kwa kunipa nafasi hii adimu kusimama mbele yenu kwa lengo la kusema machache katika ufungaji wa awamu hii ya pili ya Kongamano la kwanza la mwaka la Serikali Mtandao ambalo limefanyika kwa siku nne kuanzia 17/08/2015.

Kama ilivyoelezwa hapo awali, hili ni Kongamano la Kwanza la Serikali Mtandao kufanyika hapa nchini. Nimejulishwa kwamba awamu ya kwanza iliyomalizika tarehe 18 Agosti, 2015 ilikuwa na washiriki 473. Awamu hii iliwaleta pamoja watendaji wa taasisi za umma wanaohusika na TEHAMA,

Habari na Mawasiliano, Mipango na Utawala na Rasilimaliwatu kutoka kwenye taasisi za Umma. Awamu hii ya pili imekuwa na washiriki wasiopungua 230 wengi wao wakiwa Maafisa Masuhuli. Waandalizi wa kongamano hili wamenijulisha kwamba lengo lilikuwa ni kuwa na washiriki 500 kwa awamu zote. Hivyo, nawapongeza kwa kuvuka lengo. Aidha, ninawapongeza kwa kuwa na mpangilio mzuri wa uendeshaji wa Kongamano kubwa kama hili.

Naipongeza Ofisi ya Rais Menejimenti ya Utumishi wa Umma na Wakala ya Serikali Mtandao kwa kufanikisha Kongamano hili na kwa kutualika sisi ambao tunahusika na maamuzi katika ngazi ya juu kabisa Serikalini . Aidha, nawashukuru wageni wetu Dr. Rajendra Kumar kutoka India na Bw. TAN Kim Leng kutoka Singapore kwa utayari wenu wa kubadilishana uzoefu kuhusu utekelezaji wa Serikali Mtandao. Uwepo wenu umelifanya Kongamano hili kuwa la kipekee na ambalo limetoa mwanga na msukumo mpya katika agenda ya Serikali Mtandao.

Ndugu Washiriki,

Nitakuwa mchoyo wa fadhila kama sitotambua michango ya hali na mali kutoka kwa wadau wetu wote walioweza Kongamano hili. Wadau hao ni taasisi za Serikali zilizochangia na kuleta wawakilishi wao kwenye Kongamano hili. Aidha, kipekee nazishukuru Taasisi za TASAF, TCRA, NHIF, na Kampuni za TTCL, COMPUTECH, COPY CATS na ZANTEL kwa michango yao. Kwa niaba ya Serikali nasema tena asanteni sana.

Ndugu Washiriki,

Kauli mbiu ya Kongamano hili isemayo (kwa tafsiri isiyo rasmi) “***Rasilimali za TEHAMA Zilizowianishwa Zinaboresha Utoaji Huduma kwa Umma kwa Ufanisi***”; yaani (***Towards Harmonized ICT Recourses for Improved Public Service Delivery***). Sitaki kurudia undani wa kauli mbiu hii kwa kuwa najua imejadiliwa kwa kina. Itoshe tu kusema kwamba utekelezaji wa kauli mbiu hii unahitaji utashi, mipango na mikakati ya dhati ambayo itaainishwa sambamba na mipango mikubwa ya Serikali ili kuharakisha matokeo yanayotarajiwa yanapatikana.

Ndugu Washiriki,

Nawakumbusha kuwa, ili kufikia mafanikio yanayotarajiwa hatua za dhati zinatakiwa kuchukuliwa ili kutatua changamoto zilizopo kwenye misingi mikuu ya utekelezaji wa Serikali Mtandao. Katika muda wa siku mbili za uwepo wenu hapa, mmeona changamoto mbalimbali za utekelezaji wa Serikali Mtandao. Changamoto zote zilizobainishwa na kutolewa maazimio na Kongamano hili ni wajibu wa kila mmoja wetu kuziweka katika mipango ya taasisi yake ili zitatuliwe kwa jili ya kutoa huduma bora kwa wananchi.

Ndugu washiriki

Ni jambo la kujivunia pia kwamba, Serikali imefanya mengi katika kuzitatua changamoto hizi kama ilivyoielezwa. Hata hivyo, utatuzi wa changamoto wakati mwingine huzaa changamoto nyingine. Hivyo, jambo muhimu ni kuwa na malengo na kufanya tathmini ya mafanikio yetu kila baada ya kipindi fulani kupita. Kwa dhati ninawaomba kutatua changamoto za kiutawala ambazo

ziko ndani ya uwezo wetu ambazo kimsingi hazihitaji maazimio kwani ni majukumu yetu ya kila siku.

Katika kutekeleza maazimio yanayotokana na Kongamano hili, ni vyema pia tujiwekee muda wenye uhalisia wa utekelezaji wa maazimio hayo ambao utapimika kwa vigezo mahsusi. Aidha, tuepuke kujiwekea malengo makubwa yasiyotekelezeka au kujiwekea malengo madogo ambayo utekelezaji wake hautakuwa na tija. Mwisho, tutakapokuwa tunatekeleza malengo mbalimbali ya Serikali Mtandao tuhakikishe kuwa tunazingatia sheria za nchi na miongozo mbalimbali inayohusu Serikali Mtandao iliyopo na inayoendelea kutolewa mara kwa mara.

Baada ya kusema haya machache, naomba sasa nitamke kwamba Kongamano la Kwanza la Mwaka la Serikali Mtandao kwa mwaka 2015 limefungwa rasmi.

ASANTENI SANA KWA KUNISIKILIZA